

ATA A firma acuerdo cu Dare to Dream Foundation, pa hasi uso di Xander Bogaerts pa promove Aruba

ORANJESTAD(AAN):

Diahuebs Aruba Tourism Authority y Dare to Dream Foundation a firma un acuerdo di 1 año.

Dare to Dream Foundation ta un fundacion di nos pelotero di Major League Xander Bogaerts y tin como presidente su mama Sandra Brown.

Durante on conferencia di prensa, Director di ATA Ronella Tjin Asjoe a splica cu durante lunanan caba ATA a traha cu Bogaerts y su representantenan, despues di cual a tuma contacto tambe cu Boston Red Sox.

E intencion ta pa ATA hasi



uso di Bogaerts den accionnan di promocion di nos isla. “Pa ATA esaki ta importante, pasobra durante añanan caba nos a bin ta intensifica e balor cu nos hendenan di

Aruba tin, como parti promocional di Aruba”.

“Na November año pasa por ehempel nos a lanza un campaña cu ta carga e titulo di ‘Authentic Aruba’”.

“Entre otro nos a lanza esaki via un toma completo di Grand Central Station na New York, unda cu durante un periodo di 1 luna diferente cara di nos poblacion tabata visible na e sitio hopi ocupa aki na New York”.

Esaki segun Tjin Asjoe, kende a sigui bisa cu awor a formaliza un proceso cu Xander via Dare to Dream Foundation, pa e forma parti di promocion internacional di Aruba.

El a splica cu e acuerdo tin un duracion di 1 año.

Prensa a puntra e director cuanto ATA a inverti den esaki y el a splica cu ta 200.000 dollar.

Mitad ta bay pa Bogaerts mes, mientras cu e otro mitad ta bay pa e fundacion.

Den e acuerdo mester tene cuenta cu cierto condicionnan, di cual algun ta stipula door di Red Sox.

“Deporte tin un lugar special den ATA, apesar cu hopi biaha esaki no ta visible”.

“E enfoke primordial di ATA ta promocion internacional y atraccion di tur-



ismo di afo”.

“Un ehempel di uso di deporte ta ora cu año pasa ATA a organiza bishita di ESPN Latino America, unda cu diferente deportista local a forma parti di esaki”.

Esaki segun Tjin Asjoe, kende a sigui bisa cu e ta contento cu awor por hasi uso di nos heroe Xander Bogaerts, pa yuda promove nos isla mas ainda. Bogaerts mes no por tabata presente na e conferencia di prensa, pero segun Tjin Asjoe den e simannan prome cu e bay bek Boston, lo hasi e grabacionnan y saca e potretnan necesario pa e promocionnan di ATA den cual Xander ta bay ta involvi.

Tjin Asjoe ta contento cu e acuerdo ta pone cu Dare to Dream Foundation lo haya fondonan pa sigui cu e tremendo trabao cu nan ta hasi entre otro pa e muchanan cu ta hunga bala y tin mester di material.

**Telefonnan
di DIARIO
582-6747
Fax
582-8551**